

आकाशवाणी

खबरां

1. केन्द्र सरकारै तमिलनाडु च इलैक्ट्रानिक्स सरबन्धी माल तैयार करने आहले द'ऊं बड्डे समूह शुरु करने दा ऐलान कीता ऐ।
2. वैश्विक माली कंपनी मॉर्गन स्टेनली नै अपनी रपोर्ट च आखेआ ऐ जे भारत 2028 तगर जर्मनी गी पच्छाड़ लांदे होई दुनिया दी त्रीये नम्बरै दी सभ्मनें शा बड्डी अर्थबवस्था बनी जाहग।
3. अगले ब'रे गणतंत्र दिवस दे मौके उपपर घोषित कीते जाने आहले पद्म पुरस्कारें लेई ऑनलाईन नामांकन शुरु होई गे न। नामांकन दी खीरी तरीक 31 जुलाई ऐ।
4. म्यांमार च, लोकतंत्र समर्थकें दे नियंत्रण आहले इक ग्रांस पर सेना दे ब्हाई हमले च 6एं बच्चें सने 27 नागरिक मारे गे न।
5. कश्मीर दे केई इलाकें च कल बर्फबारी ते किश होर हिस्सें च हौली थमां दरम्याने दर्जे दी बरखा होई ऐ। मौसम विभाग नै ओडिशा च बक्ख-अलग थाहरें पर अज्ज जबरदस्त लू चलने दी शैंका जताई ऐ।
6. महिला प्रीमियर लीग क्रिकेट टूर्नामेंट दे जंदी रातीं खेड्डे गेदे फाईनल मुकाबले च मुंबई इंडियन्स नै दिल्ली कैपिटल्स गी हराइयै दुई बारी एह खिताब जित्ती लैता ऐ।

<><><><><><>

Vaishnav-TN

केन्द्री इलैक्ट्रानिक्स ते सूचना प्रौद्योगिकी मंत्री अश्विनी वैष्णव होरें घोषणा कीती ऐ जे तमिलनाडू च 1 ज्हार 112 करोड़ रपे दी लागत कन्नै दो इलैक्ट्रानिक्स विनिर्माण क्लस्टरें गी स्थापत कीता जाग। एह क्लस्टर तमिलनाडू दे पिल्लैइपक्कम ते मान्नालूर च स्थापत कीते जांगन। मंत्री वैष्णव होरें एह घोषणा तमिलनाडू दी राजधानी कशा 55 किलोमीटर दूर श्रीपेरनंदूर च नेटवर्क इलैक्ट्रानिक्स दी 7मीं विनिर्माण सुविधा दे उद्घाटन दे मौके पर कीती। इस मौके पर बोलदे होई वैष्णव होरें आखेआ जे 15 एकड़ च फैली दी जेटवर्क इलैक्ट्रानिक्स तमिलनाडू दा इलैक्ट्रानिक्स विनिर्माण उद्योग गी महत्वपूर्ण बढ़ावा देग। उनें आखेआ जे इत्थें 8 ज्हार लोकें गी रोजगार थ्होग ते इंदे च घट्ट कोला घट्ट 80 फीसदी महिला होंगन।

<><><><><><>

India Economy

वैश्विक माली कंपनी मॉर्गन स्टेनली नै अपनी रपोर्ट च आखेआ ऐ जे भारत 2028 तगर जर्मनी गी पिच्छे छोड़दे होई दुनिया दी त्रीये नम्बरै दी सभ्मनें शा बड्डी अर्थबवस्था बनी जाहग। रपोर्ट च आखेआ गेआ ऐ जे 2023 च भारती अर्थबवस्था 35 खरब डॉलरें दी ही ते अंदाजा ऐ जे 2026 तगर एह 47 खरब डॉलरें दी होई जाहग। मॉर्गन स्टेनली दे मताबक 2028 च भारत दी अर्थबवस्था बधियै 57 खरब डॉलरें दी होई जाहग ते ओह जर्मनी थमां अग्रे निकली जाहग। रपोर्ट च इब्बी आखेआ गेआ ऐ जे भारत दुनिया दे सभ्मनें शा मती मंग आहले उपभोक्ता बजार दे रूपै च उभरेआ ऐ ते आलमी सतह उपपर ओहदी दर्जेबंदी च बी काबिले-जिक्र सुधार होआ ऐ। भारती जनता पार्टी नै आखेआ ऐ जे एह असाधारण बाददा संजोग कन्नै नेई सगुआं केई ब'रें दे दूरदर्शी नेतृत्व ते दलेरी-भरोचे आर्थिक सुधारें दा नतीजा ऐ। सोशल मीडिया पोस्ट च पार्टी नै आखेआ ऐ जे जिसलै थमां प्रधानमंत्री नरेन्द्र मोदी होरें कम्मकाज सांभेआ ऐ तदू थमां तब्दीलिणं दा दौर शुरु होई गेदा ऐ।

<><><><><><>

Padma Awards

अगले ब'रे गणतंत्र दिवस दे मौके उपपर घोषित होने आले पद्म पुरस्कार 2026 आस्तै ऑनलाइन नामांकन शुरु होइ गे न। नामांकन दी खीरी तरीक 31 जुलाई 2025 ऐ। पद्म पुरस्कारें लेई नामांकन ते सफारिशां छडे राश्ट्री पुरस्कार पोर्टल उपपर ऑनलाइन स्वीकार कीते जांगन। पद्म पुरस्कार

पद्मविभूषण, पद्म भूषण ते पद्मश्री देसै दे सर्वोच्च नागरिक सम्मान च शामिल न। इनें पुरस्कारें उत्कृष्ट कर्में गी सम्मानत करदे न। पद्म पुरस्कार कला, साहित्य ते शिक्षा, खेड्ड, चिकित्सा, समाज सेवा, विज्ञान एवं इंजीनियरिंग, लोक कार्य, सिविल सेवा, बपार एवं उद्योग, आदि आंगर सारें क्षेत्रें च आसाधारण उपलब्धिं ते सेवा लेई दित्ता जंदे न।

<><><><><><>

PM-Podcast

प्रधानमंत्री नरेन्द्र मोदी होरें लोकें गी अज्ज प्रसारत होने आले लैक्स फ्रिडमैन हुंदे कन्नै गल्लबात दा अपना पॉडकास्ट इंटरव्यू सुनने दा अनुरोध कीता ऐ। मोदी होरें सोशल मीडिया पोस्ट च आखेआ ऐ जे फ्रिडमैन हुंदे कन्नै उंदी बड़ी बधिया गल्लबात होई ऐ। इस गल्लबात च मोदी हुंदे बचपन, हिमालय च बीते दा समां ते सार्वजनिक जीवन दे कन्नो कन्नी होरने केइं मुद्दे पर चर्चा होई। फ्रिडमैन होरें आखेआ जे उनें त्रऊं घेंटे तगर प्रधानमंत्री मोदी हुंदे नै पॉडकास्ट गल्लबात कीती ऐ। सोशल मीडिया पोस्ट च उनें आखेआ जे एह उंदी जिंदगी दी सब्बने शा प्रभावशाली गल्लबात ही।

<><><><><><>

Myanmar Air Strike

म्यांमार च, लोकतंत्र समर्थकें दे नियंत्रण आहले इक ग्रांस पर सेना दे ब्हाई हमले च 6एं बच्चे सने 27 नागरिक मारे गे न। मांडले पीपुल्स डिफेंस फोर्स दे प्रवक्ता नै आखेआ ऐ जे सिंगू टाउनशिप दे लेट पैन हला ग्रांस च कल होए दे ब्हाई हमले च 30 लोक घाऽल बी होए न। मांडले पीपुल्स डिफेंस फोर्स, म्यांमार दे मुख्य बरोधी दल दा समर्थक ऐ। पिछले बरे जुलाई च इन्नै सिंगू शैहरा पर कब्जा करी लैता हा। फौजी सरकार नै लोकतंत्र समर्थक सशस्त्र पीपुल्स डिफेंस फोर्स ते जातीय अल्पसंख्यक गुरिल्ला गुटें खलाफ ब्हाई हमले तेज करी दित्ते न। इनें गुटें दी केई दहाकें थमां खुदमुख्तयारी लेई लड़ाई जारी ऐ।

<><><><><><>

Pak Blast

पाकिस्तान दे क्वेटा च कल बम्ब धमाके च आतंक-रोधी बल दे इक कर्मी दी मौत होई गई, जदके 6 जने घाऽल होई गे। करणी इलाके च बरोरी रोड पर गश्त करै करदी आतंक-रोधी बल दी इक गड्डी गी निशाना बनाइयै एह धमाका कीता गेआ। एहदे च बल दे 7 कर्मी घाऽल होई गे। घाऽल होए दे इनें कर्मियें गी अस्पताल लेई जंदे बेल्ले इक कर्मी दी मौत होई गई। तोआई, जाफर एक्सप्रेस रेलगड्डी पर हमले दे बाद क्वेटा डिवीजन च रेलगड्डियें दा परिचालन फिलहाल बंद ऐ। बलूच लिबरेशन आर्मी नै 11 मार्च गी सामरिक महत्व आहली बोलन घाटी च क्वेटा थमां पेशावर जा'रदी जाफर एक्सप्रेस रेलगड्डी दा अपहरण करी लैता हा। एहदे च 200 सुरक्षा कर्मियें सने 450 थमां मते जात्तरी सोआर हे। तोआई, पाकिस्तानी सुरक्षा सूत्रें दावा बन्नेआ ऐ जे जाफर एक्सप्रेस बचाऽ अभियान पूरा होई गेआ ऐ, ते 346 बंधकें गी बचाई लैता गेआ ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" इस बारी 30 मार्च गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे

तुरत मगरा एह्दा डोगरी च अनुवाद प्रसारत कीता जाग। एह्दा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Weather

कश्मीर दे केई इलाकें च कल बर्फबारी ते किश होर हिस्सें च हौली थमां दरम्याने दर्जे दी बरखा होई ऐ। अनंतनाग, कुलगाम, शोपियां, पुलवामा, गुलमर्ग, सोनमर्ग ते पहलगाम च बर्फबारी होई। बांडीपुरा जिले दे गुरेज, कुपवाड़ा दे किश इलाकें ते घाटी दे दूर-दराज दे इलाकें च बी बर्फबारी दी खबर ऐ। कश्मीर दे होरनें हिस्सें च हल्की बरखा होआ करदी ऐ।

तोआई मौसम विभाग नै ओडिशा च बक्ख-अलग थाहरें पर अज्ज जबरदस्त लू चलने दी शँका जताई ऐ। विदर्भ, छत्तीसगढ़, झारखंड, उत्तरी तेलंगाना च अज्ज ते पच्छिम बंगाल दे गंगा कन्नै लगदे इलाकें सने सौराष्ट्र ते कच्छ च अगले द'ऊं दिन लू चलने दी शँका ऐ। मौसम विभाग दी वरिष्ठ वैज्ञानिक सोमा सेन राँय नै आखेआ ऐ जे ओडिशा च अज्ज भीषण लू चलने दी गंभीर चेतावनी जारी कीती गई ऐ, जदके झारखंड ते पच्छिम बंगाल लेई अगले द'ऊं दिनें दरान लू चलने दा येलो अलर्ट जारी कीता गेआ ऐ। विभाग नै आंध्र प्रदेश, यनम, केरल ते माहे च बक्ख-बक्ख थाहरें पर अज्ज मर्ग ते खुश मौसम दा अंदाजा जताया ऐ। मौसम विभाग नै उत्तराखंड च अज्ज ते अरुणाचल प्रदेश च अगले द'ऊं दिनें दरान मौहलेधार बरखा दी बी संभावना व्यक्त कीती ऐ। विभाग नै आखेआ ऐ जे अगले द'ऊं दिनें च असम, मेघालय, नागालैंड, मणिपुर, मिजोरम ते त्रिपुरा च तूफान औने दी संभावना ऐ।

<><><><><><>

WPL

महिला प्रीमियर लीग क्रिकेट दे फाइनल च कल रातीं मुंबई रु मुंबई इंडियन्स नै दिल्ली कैपिटल्स गी 8एं रंजें कन्नै शिड़्यै दऊं बारी खिताब जित्ती लैता ऐ। दिल्ली कैपिटल्स दा एह् फाइनल च लगातार त्रीह हार ऐ। मुंबई इंडियन्स नै पैहले बल्लेबाजी करदे होई तैहशुदा 20एं ओवरें च 7 विकेटें दे नुक्सान च 149 रंज बनाए। हरमनप्रीत कौर नै 44 गेदें च 66 रंज दी शानदार पारी खेड्डी। परते च दिल्ली कैपिटल्स दी टीम 9 विकेटां मोआइयै 141 रंज गै बनाई सकी। हरमनप्रीत कौर गी प्लेयर ऑफ द मैच दा खिताब दित्ता गेआ ते नेट सिवर ब्रंट गी प्रतियोगिता दा सब्बनपे शा महत्वपूर्ण खडारी चुनेआ गेआ।

<><><><><><>